

鄧園全書

序

嘗聞龜山少女名署玉書南嶽夫人歌聞雲璈華巔朱履
因亂世而昇雲劉氏白鵝厭塵氛而度世誠以天姿絕俗
秀氣凌煙中懷瀟灑林下之風飄飄出塵之想豈能抑遐
志于金屏老雲翹于珠戶哉蓋吹笙馭鳳非俗世之賓棲
月乘鸞豈人間之婦是以流霞玉英不同金石之翫琪花
朱草鮮齊桃李之芳九英之芝莫育于常囿五色之泉不
流于濁溪何則物有姱而自貴性有異而獨遙殊情孤邁
雋采易遷斯神明之靈淑固溷濁之所難畱也夫古之淑
媛秀質金閨雅麗之姿椒房窈窕之選亦有明詩嫺禮摛
賦擅詞令辭敷灑昭宣德聞冊光麗采墨鐫芳華馨播詞

人之口照耀文士之目然或蘭摧別苑珠碎高樓長門永
歎塘上空悲或辭身鄉國崎嶇異域隕魄胡沙埋魂驛路
莫不泣飲寒聲愁啣弱影琵琶夜月恨與雁而長飛繡嶺
春風怨隨花而不落爰思淑姿令終多才而寡累者固什
不獲二三也豈若御青霞入紫霓友素娥而侶宓妃哉余
甥瓊章葉虞部仲韶之三女也生而靈異慧性夙成長而
容采端麗明秀絕倫翠羽朝霞同于圖畫輕雲迴雪有似
神人年十餘知詞賦十三四工篇章并古文及齊梁體皆
過目能誦操翰成章朗雋適逸咸遵其致十五學琴與奕
摹古人書畫無師而解其意舉止莊靜不妄言笑史書所
稱無以過也乃復身存華闈志逸煙巒以婉孌之年懷高

散之韻紫水芙蓉之詠半屬遊仙錦書飛雲之編爰思大道寓懷雙鶴無非翫水之詞寄意六花盡皆瑞葉之句夢越紅泉瑤姬不遠情依碧嶠銀闕非遙斯誠達人之所幾詎知才士之所及至年十七將嫁而遽隕逮斂之日玉色輝朗朱唇鮮澤舉體輕柔類同尸解稽其旣沒之景合其生存之辭若符一致固非馮雙之偶降卽同蘭香之再生矣繇斯以譚心高五岳氣軼層霄方且恥彩鸞之多嫁嘗弄玉之有夫焉肯畫眉玉鏡掩袂鳳帷也哉嗟夫神山萬里方士望而難來靈鶴千年華表歸而無日金壘月冷爰同玉女之壺花砌苔封旣是麻姑之石遐哉邈矣孰可謾焉母氏宛君吾家道蘊也教三女長昭齊次蕙綢皆知詩

屬文而瓊章尤爲挺拔如劉家令嫺竟芳年蚤世悲夫惜
哉仲韶文章才行旣顯厥世儒雅風藻洽于家庭故諸子
能言卽知誦詩毀齒卽能爲文瓊章之沒大小皆有詩文
祭之雅麗可觀殆其性然歟咸集而著之于世覽者明焉
時崇禎壬申十有一月沈自炳君晦題

返生香

疎香閣遺集

午夢堂全集之三

十洲記曰西海中洲上有大樹芳華香數百里名爲返魂亦名返生香筆墨精靈庶幾不朽亦死後之生也故取以名集

吳江葉氏小鸞瓊章一字瑤期 著

五言古詩

六首

春日

芳朝麗淑景庭草茸清香簾櫳搖白日影弄春花光粧梳
明月髻杯浮碧華觴瑤池諒非邈願言青鳥翔

午日

暄風日正午砌花繞蘿門一一燕子飛掠煙成漪紋榴苞

競霞紅竹粉縈蛾綠綵絲繫皓腕金杯泛香粟

九日

近作

風雨重陽日登高漫上樓庭梧爭墜冷籬菊盡驚秋陶令
一樽酒難消萬古愁滿空雲影亂時共雁聲流

于歸在邇何愁之有而且云萬古也明明識語
張方伯棄楚臬而歸卽有此變暗符陶令事甚奇

曉起

曙光催薄夢澹煙入高樓遠山望如霧茫茫接芳洲清露
滴碧草色與綠水流窺粧簾帷捲清香逼衣浮聽鶯啼柳
怨看蝶舞花愁茲日春方曉春風正未休

池畔

涼風襲輕袂徘徊臨前池欄花映日發婀娜餘芳姿澄波

燦明鏡照我幽人思我思在霄漢颺舉任所之但恐歲月
晚相看淚如絲試採芙蓉花何如茹隱芝

遊仙是平日本懷但十六七歲女子
何至歎歲月晚淚如絲靈先告之耶

秋雁

西風天氣肅菽菽梧飄黃征人塞上淚隨雁歸故鄉我無
遼陽夢何事飛蒼茫所有一緘書欲致瑤臺傍寄之西王
母賜吾金玉漿一吸生瓊羽與我共翱翔

遐思曠想自當仙去
豈塵世所能久留

七言古詩 七首

山中思

擬騷體

山氣深兮岑寂危巒複兮蒼茫上有長松之欹倚下有古

澗之清涼俯眺兮平麓遙瞻兮層谷水流兮花開緣崖兮
茅屋風淅淅兮落紅葉之蕭蕭草萋萋兮映碧蘿之迢迢
白露兮溼無名之綠草枯藤兮掛子規之孤巢閉石室兮
理瑤琴蔭林屋兮密森陰渺惆悵兮叢桂黯思君兮我心

重午

己巳十
四歲

桐陰羃歷靄晴空晝影一簾庭草濃扇圖秦女鴛鴦綠酒
滴胡姬琥珀紅金釵繡虎分時樣素簪榴蓋浮華叢黃鶯
紫燕席邊語沼蓮籬槿生涼風此時羅綺香無汗一曲高
歌樂未終

慈親命作四時歌

春雨霏微花氣浥江村處處春相及半庭芳草黛煙濃

樹梨花粉痕溼數聲啼鳥冒遊絲曉來拂拂東風急東風
蝴蝶尋香飛新鶯欲語嬌還澁陌上隄邊更可憐香車寶
馬紛相集高樓簾捲畫屏開落花飛絮隨風入榆錢滿地
更堪愁難買東君又九十折花安頓膽瓶中猶恐春光暗
收拾

夏

槐陰滿地人初起呢喃掠水風翻紫晝閑只有鶯亂啼香
氣菁葱浮芳芷池中菡萏羨霞粧簾前茉莉含冰蕊蕉葉
風清映畫廊畫廊曲繞鴛鴦汀寂寞枝頭落槿花人靜棋
聲碧窗裏夢回枕簟玉肌涼繡床團扇清如水朱欄倦倚
晚風多落霞夕霽如明綺漸看新月掛枝梢隔浦採蓮歌

未已

秋

銀河黯澹流螢度怨蛩脈脈啼秋露砧聲何處擣閨衣
夜色淒淒泣寒兔蕭瑟西風蔓草衰芙蓉猶落餘香嫋隔窗
絡緯織更殘銀床梧葉摧黃羽閒雲來往自悠悠空庭滴
瀝青蘚雨雨絲寂寞柳煙消溼月籠香浮桂樹桂影重階
不捲簾傷秋人向凭欄暮蕭蕭楓葉落吳江湘鴻幾處雲
中素

冬

黃昏譙鼓傳初刻重重羅幙寒悽惻一雁孤飛半夜驚千
林凍色連雲織笛聲吹曉戍樓風漁舟冷遍蘆花國栖鳥

啞啞寒不飛梅花影瘦西窗側天孫剪冰作瑤花美人粉
染青山色曉來粧罷隔簾看金樽猶恐寒相逼白雪金樽
酒一卮玉山欲頹嬾無力還思此日征人淚少婦流黃長
歎息

雲期兄以畫扇索題賦此

春來處處盡芳菲寂寂山花暎水飛水色似明春月鏡花
光欲上美人衣子規啼老無人處蝴蝶滿山粉落絮邈然
青天不可攀惟見江水流潺湲江外雲山幾曲重丹崖翠
岫交蒙茸霏微煙際桃花雨氤氳香前薜荔風松聲一響
度萬壑下有幽人桂艇泊扣舷長嘯數峯青卧看吹花巖
下落沈沈谿畔石屏開裊裊游絲綴綠苔碧羅倒掛亘千

尺深山寂靜真幽哉白雲千古悠悠在獨坐對此心徘徊
前溪流出胭脂水疑是漁郎渡口來

五言律詩 十二首

憶父京師

風雪催殘歲山川隔上都鄉書空北往胡馬日南驅江上
尊鱸老城頭鼓角鳴何堪一回首千里白雲孤

秋日村居次父韻作

疏煙籠畫箔掃徑酌松醪拾翠猶憐草秋紅不讓桃低花
欹日暖啼鳥怨風高綠水金徽奏清商調正酒
徘徊粧罷後迤邐綺櫳開日靜披雲卷衣香覆羽杯雨驚
殘葉去風送曉涼來數朶芙蓉映穠姿亦麗哉

小院梧桐覆銀牀色不分重幃深鎖月敞閣畫飛雲粉障
堪畱影幽花若笑羣爐香銷靜坐微雨隔簾聞

古松依石壁人立翠蘿邊鬢髮花爭豔飄衣色更鮮緘書
催北雁涼月掛南天試向迴廊看欄杆影又偏

迴文愁織婦金翦憶征夫閨夢眞堪淚村歌獨滿途蕭蕭
看落葉耿耿汲寒轡千里嬋娟暮蒼茫玉映湖

昨宵香透幙曉起倚花看桂已檀黃嫩蓮初黛粉乾清粧
秋水映芳袖露華寒莫問滄江冷幽庭景自漫

水簟波長靜湘鈎捲更悠繡餘芳草暖書罷夕陽休團扇
慵題怨雙蛾豈解愁遙思秦弄玉千載一簫樓

秋氣悲搖落清心澹不關竹梢梳白日水面洗青山臨鏡

花常曉薰香韻自閒幽懷何所寄遠在碧霄間

秋夜不寐憶蕙綢姊

夜色正蕭蕭輕風響竹梢檻桐催葉落岸柳泣絲飄砌冷
蟲喧息燈殘火燼消彈棋曾敘別風雨又連宵

秋夜偶作用村居內二韻

屋傍清江曲蘋花兩岸分候涼頻聽樹待月每嫌雲浪遠
漁堪隱沙平雁幾羣階前啼絡緯砧杵隔林聞
迢遞煙霞處翩翩鷗鳥悠溪流樵路斷山抹夕陽休黯黯
秋雲思瀟瀟暮雨愁西風發爽氣一夜到粧樓

七言律詩 六首

早春紅于折梅花至偶成

遲遲簾影映清霄日照池塘凍若消
公主梅花先傳額美人楊柳未垂腰
紗窗繡冷畱餘線綺閣香濃遶畫綃
試問侍兒芳草色階前曾長翠雲條

紅于其隨身侍兒
平日所最憐惜者

昭齊姊約歸阻風不至

寒爐撥盡燼微紅漠漠江雲敞碧空
離別遂如千里月歸期徧悵一帆風
愁邊花發三春日夢裏年驚兩鬢中
雨雪滿窗消未得定應握手幾時同

秋暮野望有感

遠浦歸帆帶夕陽一聲漁笛過橫塘
疏楊影瘦蟬聲咽黍黍風低鳥渡忙
北望雲山如恨疊東流日夜似愁長
蕭條

此際柴門寂極目平蕪總斷腸

平日現歡喜相說法者略無一愁態
握筆便多斷腸語亦是不祥先識

庚午秋父在都門寄詩歸同母暨兩姊和韻

別離歲久各咨嗟蕭瑟西風道里賒鄉信幾傳遙涕淚歸
期屢約黯年華羌笛裏寒梅落闐闐宮前御柳斜胡馬
於今應出塞暫須寬慰莫思家

尚欲寬慰父懷其如一死使父肝腸寸
寸碎也詩墨猶新人安往哉傷哉痛哉

偶見雙美同母及仲姊作

昔年西子應慚獨今日東隣卻遇雙黛拂春愁爭對鏡笑
分花靨共窺窗若非拾翠來湘水定是遺珠涉漢江宋玉
多情曾賦否高唐神女亦心降